

Debat Terbuka Hanya Beri Ruang Kepada Pembangkang Serang Kerajaan: Syed Ali Bernama
19 Jun, 2012

KUALA LUMPUR, 19 Jun (Bernama) -- Debat secara terbuka antara pemimpin kerajaan dengan pembangkang hanya akan memberi lebih ruang dan peluang kepada pembangkang untuk menyerang kerajaan secara tidak berhemah, kata Ketua Umno Bahagian Cheras Datuk Syed Ali Alhabshee.

Justeru Setiausaha Badan Perhubungan Umno Wilayah Persekutuan itu berkata mana-mana pemimpin Umno dan Barisan Nasional (BN) tidak sepatutnya menyahut debat yang ditawarkan pembangkang.

"Ini (debat) adalah jerat pembangkang untuk mencari publisiti khususnya menjelang pilihan raya umum ke-13 yang semakin hampir. Debat ini hanya bercakap sahaja, retorik.

"Ini bertujuan untuk mengalih perhatian rakyat yang sebenarnya sudah tahu pembangkang ini tak buat kerja. Jadi dia (pembangkang) gunakan platform ini untuk kepentingan mereka sendiri," katanya kepada Bernama di sini.

Beliau berkata demikian mengulas tindakan Timbalan Menteri Pengajian Tinggi Datuk Saifuddin Abdullah yang bersetuju untuk berdebat dengan Naib Presiden PAS Salahuddin Ayub yang diadakan malam ini anjuran akhbar Sinar Harian.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=674190>